

senibudaya



# Pamer projek seni bina 12 IPT



Oleh **Faizatul Farhana Farush Khan**  
ffarhana@bh.com.my

► **Kuala Lumpur**

**H**asil tugas mahasiswa dari 12 politeknik serta universiti di dalam dan luar negara diketengahkan pada Pameran Projek Pelajar Tahun Akhir Seni Bina 2017 yang sedang berlangsung di Galeri Kuala Lumpur hingga 30 Julai ini.

Pameran julung kali anjuran Universiti UCSI itu bertujuan meletakkan tanda aras sama antara institusi pengaji-

an tinggi (IPT) terbabit dalam menonjolkan buah tangan penuntut masing-masing.

Ketua Program Seni Bina Universiti UCSI, Atirah Hazwah Abdullah Hani, berkata orang ramai berpeluang menyaksikan sentuhan kreatif daripada sembilan IPT tempatan, termasuk universiti penganjur, dan tiga lagi luar negara di bawah satu bumbung.

“Pelajar yang mengambil bahagian dan pengunjung boleh melihat serta mengetahui mesej diketengahkan di sebalik setiap projek seni bina ditampilkan,” katanya ketika ditemui pada majlis



**Atirah Hazwah Abdullah Hani**

pelancaran pameran itu di sini, baru-baru ini.

**Kongsi ilmu**

Atirah Hazwah berkata, pameran itu mendapat sokongan Lembaga Arkitek Malaysia yang bertanggungjawab menetapkan asas tajuk tugas final perlu dihasilkan mahasiswa, selain Pertubuhan Arkitek Malaysia.

Katanya, pameran bermula 10 pagi hingga 5 petang setiap hari itu bukan sahaja dapat menyumbang ke arah perkembangan bidang seni bina tempatan tetapi juga memupuk percambahan

idea kreatif dalam kalangan mahasiswa dan membuka ruang perkongsian ilmu secara bermanfaat.

Selain itu, beliau berkata, pameran itu dapat merapatkan hubungan dalam kalangan mahasiswa dan universiti yang mengambil bahagian, di samping membantu menjana modal insan berkemahiran tinggi.

“Pemilihan Galeri Kuala Lumpur yang menjadi tempat tumpuan warisan sejarah negara, sebagai lokasi pameran ini mampu memperkenalkan budaya kita kepada masyarakat tempatan dan luar negara,” katanya.

**Pameran Projek Pelajar Tahun Akhir Seni Bina 2017**

Antara IPT terbabit

- Universiti UCSI
- Universiti Malaya
- Universiti Teknologi MARA
- Universiti Putra Malaysia
- Universiti Islam Antarabangsa Malaysia
- Taylor’s University
- Universiti Tunku Abdul Rahman
- Universiti Chulalongkorn, Thailand
- Politeknik Malaysia